

# Hawke dakwa Asean perbesarkan krisis

CANBERRA, Khamis — Perdana Menteri Bob Hawke berkata hari ini, pertikaian negaranya dengan Asean mengenai masalah Kampuchea sudah tidak terkawal.

Hawke memberitahu Parlimen bahawa beberapa negara anggota Asean cuba memperbesar-besarkan pertikaian yang berpunca dari ketetapan mengenai Kampuchea di Bangsa-Bangsa Bersatu dulu.

Asean yang dianggotai oleh Indonesia, Singapura, Malaysia, Thailand dan Filipina telah me-

nangguhkan dialog dengan Australia sehingga pertikaian itu selesai.

"Kami telah mengambil langkah-langkah untuk menyatakan kepada Asean kebimbangan kami terhadap perkembangan yang ada sekarang di mana jurucakap Asean telah memperbesar-besarkan satu keadaan yang telah pun dijelaskan oleh Menteri Luar kami di Bangsa-Bangsa Bersatu," katanya.

Beberapa negara anggota Asean telah mengecam Australia setelah negara itu enggan menaja bersama keteta-

pan Asean yang menggesa Vietnam mengundurkan tenteranya dari Kampuchea.

Australia mengundi ketetapan itu tetapi berkata, ia bimbang sokongan terhadap tajaan ketetapan itu bermakna, kerajaan itu mengiktiraf Khmer Rouge.

"Kami sebenarnya bersetuju dengan pendirian Asean mengenai isu Kampuchea," kata Hawke.

Tetapi, tambahnya, "kerana penekanan terhadap rejim Khmer Rouge yang kami anggap kejam, kami tidak boleh turut menaja ketetapan itu".

Hawke dan Menteri Luarnya, Bill Hayden mengkritik Menteri Luar Singapura, Suppiah Dhanabalan semalam.

Hayden berkata, Dhanabalan sedang berusaha untuk mendesak Hawke menjelaskan pendirian Australia mengenai soal Kampuchea apabila beliau melawat Thailand minggu depan. Katanya, tindakan Dhanabalan itu adalah kurang wajar dan tidak boleh diterima.

## Dialog

Akhbar Age di Melbourne memetik Menteri Luar Indonesia, Mochtar Kusumaatmadja sebagai berkata, Australia harus menggantung semua usahanya untuk mencari penyelesaian politik di Kampuchea dan "membiarkan perkara itu kepada kami untuk sementara waktu".

Tetapi Age berkata, Mochtar membayangkan bahawa penggantungan dialog dengan Australia itu mungkin untuk sementara sahaja dan hubungan keseluruhan adalah tetap seperti biasa.

"Hubungan kami adalah baik. Kami perlu ingat bahawa percanggahan pendapat juga berlaku di antara sahabat". — AP.

Bahan asal dari Arkib  
Negara Malaysia